

Le o texto con moita atención.

Primeiro fai unha lectura rápida; despois, volve lelo amodiño, fixándote ben en todos os detalles, para poder responder as preguntas sen miralo.

En certa ocasión, nunha escola de Francia, propúxoselles aos estudantes facer unha descrición dun mamífero ou dunha ave. Disque un rapaz escribiu a seguinte descrición:

O paxaro do que vou falar é o moucho. O moucho non ve de día nin de noite, está cego como unha toupa. Non sei moito que digamos do moucho así que vou continuar con outro animal: a vaca.

A vaca é un mamífero. Ten seis lados: a dereita, a esquerda, o de arriba e o de abaixo. Detrás ten un rabo, do que pendura unha brocha. Con esta brocha, espanta as moscas para que non caian no leite. A cabeza serve para que lle medren os cornos e ademais porque a boca ten que estar nalgún lado. Os cornos son para trucar con eles.

Debaixo da vaca hai leite. Está equipada para que se poida muxir. Cando se moxe, o leite vén e xa non para máis... Como o fai? Aínda non o dou comprendido, pero sae cada vez con máis forza!

O marido da vaca chámase boi. Non é un mamífero.

A vaca non come moito pero o que come, cómeo dúas veces, así que xa ten abondo. Cando ten fame brúa e cando non di nada, é porque o seu interior está cheo de herba.

As súas pernas baixan ata a terra.

A vaca ten o olfacto moi desenvolvido: pódese cheirar desde lonxe. Por esa razón no campo o aire está moi limpo.

1 Clasifica os nomes dos animais que se mencionan no texto:

Ave	Insecto	Mamíferos

• Agora, debúxaos.

2 Rodea as partes do corpo da vaca que aparecen na descrición:

- | | | | |
|--------|--------|--------|-------|
| cornos | boca | cabeza | rabo |
| fociño | orella | pezuño | patas |

3 Que significa **muxir**? Subliña a resposta correcta:

- | | |
|------------------------|---------------------------|
| a) Facer muuuu a vaca. | c) Sacar leite dos ubres. |
| b) Mastigar a herba. | d) Pastar. |

4 Que quere dicir o rapaz ao explicar que a vaca «o que come, cómeo dúas veces»? Marca as dúas respostas posibles:

- Que lle gusta moito a comida e repite.
- Que a vaca é un mamífero ruminante.
- Que só come dúas veces ao día.
- Que rumia ou mastiga os alimentos dúas veces.

5 Escribe ti unha descrición máis adecuada da vaca.

.....

.....

.....